

籌辦夷務始末

同治朝
卷二十三之二十四

347.911
S0000

一

二

三

四

五

六

七

八

九

籌辦夷務始末卷之二十三

同治三年甲子正月乙巳

諭議政王軍機大臣等據崇實等奏遵旨設法查提田興恕密陳各情。並據總理各國事務衙門將駱秉章所致信函呈覽。所稱田興恕在松桃一帶路途既有阻塞。蹤跡亦無定向。意欲總理衙門再與柏爾德密酌議。先將田興恕罪名令貴州擬定。迅速奏結。一面將其提解遣戍等語。所慮不為不周。惟此事前據總理衙門密片陳奏。柏爾德密意稍活動時。卽乘機告以將該革員發往新疆。不准援免。卽可立結。自可無庸監禁。以免稽遲。而該公使覆稱。拏問一節。已告知本國。此時拏問之人並未監禁。

卽拏問亦恐不實。必須監禁後。給予照會。以便寄知本國。卽可辦結。是該將軍設想所及。卽總理衙門所業經商辦而未能首肯之事。田興恕情罪重大。該公使應允僅止監禁遣戍完案。實屬萬不可失之機會。今拖延日久。再與饒舌。強以所難。彼必仍以礙難告知本國為詞。且恐謂中國盡屬虛言誑誘。乘機生釁。頓翻前議。屆時該將軍等尚欲顧全國體人心。不知又將何所措手也。著崇實駱秉章懷遵上年十月二十四日密寄諭旨。迅速設法。將田興恕查提到省。或卽照駱秉章此次函內所擬。選其平素相信之人前往查提。先使之釋然不疑。迨入川後。卽行羈禁。一面迅速奏聞。卽可明降諭旨宣示。完結此案。川黔兩省

教民咸使聞知。當無異議。此事關係至重。崇實。駱秉章。切不可稍存推諉之見。再延時日。致誤全局。懍之。崇實等原摺已留中矣。

丙辰。署烏里雅蘇台將軍麟興。參贊大臣車林敦多布奏。

奴才等前於十一月十二日。接准分界大臣將軍明誼等來

文。內開明年分界後。有關烏里雅蘇台所屬唐努烏梁海遊牧。必須豫為查出卡內蒙古地方。急將地名咨覆。以便換約後。安置唐努烏梁海人戶等語。並查前咨內有俄國分界議單。內載自沙賓達巴哈起。因山嶺先往西。後往南。行至唐努鄂拉達巴哈。轉往西南。緣大嶺往東南水流之

處。為中國地。往西北水流之處。為俄國地等語。努等接閱之下。因不知唐努鄂拉達巴哈究係何處。所關唐努烏梁海地面究係若干人戶究係若干。因烏梁海地圖。已為將軍明誼帶赴塔爾巴哈台。實無查考。派令委署筆帖式雅爾哈前往唐努烏梁海印務處。查取該處原存烏梁海五旗總管所屬並扎薩克圖汗賽因諾顏兩部落王貝子公扎薩克台吉等所屬烏梁海地圖。照樣繪圖。詳細覈對。該俄人議單內。並未載有自沙賓達巴哈向東南行走字樣。查圖中所繪沙賓達巴哈。似在唐努烏梁海各遊牧西北界。圖中並未載有唐努鄂拉達巴哈地名。僅見唐努烏梁

海總管瓦齊爾厄勒特貝子察克都爾扎勒游牧內。迤北。有鄂蘭山一處。署理印務總管興達遜游牧內。有前唐努山一處。總管車都布游牧西北。有中唐努山一處。後唐努山一處。此四處據圖中所繪。似皆在沙賓達巴哈東南。或該俄人卽以鄂蘭山為唐努鄂拉達巴哈。抑或以唐努山卽為唐努鄂拉達巴哈。若以鄂蘭山卽為唐努鄂拉達巴哈。轉往西南行走。已闕唐努烏梁海總管瓦齊爾厄勒特貝子察克都爾扎勒游牧。若以唐努山卽為唐努鄂拉達巴哈。不但該唐努烏梁海總管瓦齊爾厄勒特貝子察克都爾扎勒所屬人戶。全行包去。且與各總管地面人戶俱

有關係。查唐努烏梁海總管瓦齊爾所管烏梁海十牛朶。
歷年共應交進。

貢貂皮人二百二十九戶。厄勒特貝子察克都爾扎勒所屬
烏梁海人丁戶口。大約亦在數千名口。兩項人戶通盤合
算。不下萬餘。其公共游牧處所。大約南北在五六台。東西
在七八台。若於卡內尋覓處所安置。不但該唐努烏梁海
等。每歲有缺。

貢物。且查卡內地面雖寬。俱係奉

旨賞給兩部王公扎薩克等世代住牧處所。各旗均分有一定界
址。若各處查勘。實非一時所能辦理之事。現據分界大臣

咨催甚急。努等再四商酌若不請

旨飭下理藩院轉飭兩部落盟長等會議。僅由努等派員前往各旗查勘。不但有需時日。且恐該王公等恃有奉

旨賞給伊等住牧在先。臨時必致藉端推諉。縱使暫為允從。日後難免滋生事端。惟有請

旨飭下理藩院轉飭扎薩克圖汗賽因諾顏兩部落盟長。以及各王公扎薩克台吉等趕緊妥為會議。讓出地面。俟該盟長等將所讓地面議妥。開清地名界址。加具印甘各結呈報前來。努等再行派員前往所報之處。詳細查明。可否安置。一面恭摺奏

開一面飛咨分界大臣等酌覈辦理

御批總理各國事務衙門查議具奏

己未閩浙總督左宗棠福建巡撫徐宗幹奏臣等准總理各國事務衙門咨據福州關稅務司美理登申請以臺灣府打狗港雞籠口三處添設正口子設立司稅經理有益稅課飭卽妥議會奏開辦等因卽經飛飭臺灣道府體察情形速籌詳辦並劄派副稅司前往會同試辦會摺馳奏在案茲據署臺灣道陳懋烈署臺灣府知府葉宗元會同通商委員延平府知府補用道馬樞輝會稟臺灣本非通商口岸自咸豐九年美國使臣請照和議條約在臺灣

開市完稅。奏定以淡水之滬尾口為美國通商馬頭。十一年六月。英國領事官卹和到臺。因鹿耳門外水淺潮大。不能停泊。由打狗港登岸。晉郡察看臺灣府城海口淤滯。船隻不能收泊。難作通商馬頭。亦定議淡水之滬尾設關。已於同治元年六月二十二日開辦。茲美理登擬在府城添設正口。不至鹿耳門口。本地商船尚不能出入。洋船焉能進泊。若洋船有在鹿耳外寄枕。不免偷漏情事。則打狗港相距水程不遠。似可責成該處委員派撥巡船認真巡查。或押令徑赴打狗港。卽旂後港盤驗。並移行文武汛口。暨出示曉諭內地商民。不准與鹿耳門外寄枕洋船勾通貿易。

易其弊可絕。不必在府城設口也。惟雞籠頭與旂後港既有洋船停泊。應一律添設子口。均歸滬尾正口管轄。至稅務司所擬章程。應俟試辦之後。隨時察看。同應需經費。另行會議稟辦等情。由省局司道覈詳請奏前來。臣等伏查臺灣海口。既經查明淤淺。應請毋庸設口。現在淡水廳所轄之雞籠一口。已據具報於同治二年八月十九日開闢。啟徵作為滬尾外口。其鳳山所屬之打狗港。卽旂後一口。應遵照總理各國事務衙門原咨。一併作為外口。徵收洋商進出口正稅。並復進口半稅。統歸淡水滬尾正口管轄。惟旂後港相距滬尾較遠。仍由臺灣道府會同辦理通商。

委員查勘。在於旂後酌設員役稽徵所收稅銀就近解存
府庫。歸滬尾造報。如有洋船在府港口外停泊。由管口委
員移令地方官押令歸於旂後港盤驗徵收。以杜偷漏。
御批。該衙門知道。

丁卯總理各國事務恭親王等奏。同治三年正月十五日。
軍機處鈔出署烏里雅蘇台將軍麟興等奏稱。准分界大
臣等咨。查勘安置唐努烏梁海人戶地面等因。一摺。奉

旨。總理各國事務衙門查議具奏。欽此。臣等查西北邊界俄人蓄
意侵占已久。咸豐十年間。乘我倉卒。要求立約。嗣俄國使
臣與明誼等在塔城會議。堅稱按照和約。必應以常住卡

倫為界。並送來議分清單。經明誼等再三駁辯。該使不遂所欲。忿怒回國。並言將來祇好帶兵強占。明誼等復屢次給該國西悉畢爾衙門照會。催其派使再來公平會商。疊據照覆云。送來議單。萬不能稍有所讓。卽再行會議。亦屬徒勞。遂遣兵在各卡倫外尋釁滋擾。臣等每接明誼等咨報。卽面與該國住京公使辯論。並因條約內有往西直至字樣。遂給與照會。專指往西為一層。直至為一層。又以常住二字與長住不同。與之反覆講解。該使總執定非條約本文之義。迨至詞窮。則云漢文為繙譯錯誤。復屢稱此事。總由該國分界大臣主持。故意推諉。正在往返詰辯間。據

伊犁將軍常清奏報○俄人闖卡撲營○開礮接仗○該處餉缺已久○恐難支持○請

飭分界大臣迅速定議等因○並據麟興奏咨○烏梁海各蒙古膽小無能○斷不能恃其齊心禦侮等語○臣等以該國住京公使向辦各事○均係迫不及待○獨公界事宜○兩年以來從未催辦○是該國早年暗中侵占○已有牢不可破主見○既據各該處疊次奏報餉絀兵單○戰守兩難○誠恐兵連禍結○不可收拾○各該處既不能力遏兇鋒○因權利害之輕重○於上年七月間奏請

允准照該使議單辦理○並於年底軍機處鈔交寄

諭明誼等。速卽知照常清麟興。廣鳳等。迅將所屬蒙古烏梁海及
哈薩克。希魯特。一併豫籌安置處所。妥議章程辦理。至伊犁各
城有礙蒙古人等生計數處。能否令俄國讓出數百里以便安
置此項人眾之處。並著明誼等於該使臣會商時相機辦理。毋
稍拘執等因。欽此。欽遵在案。茲查麟興原奏內稱。俄人議單所
載唐努鄂拉達巴哈。烏里雅蘇台所屬唐努烏梁海實無
其名。或卽指鄂蘭山。抑或指唐努山。於各蒙古等地面
人戶俱有闕礙。擬請理藩院轉飭扎薩克圖汗賽因諾顏
兩部落盟長。以及各王公扎薩克台吉等讓出地面。再行
酌覈辦理等語。臣等查唐努鄂拉達巴哈係指何山。該處

尚難指定。臣等更無從懸揣。惟該署將軍所慮闕礙地方人戶被其包去等情。則勢所必然。因思前奉寄

諭。有伊犁各城有礙蒙古人等生計數處。能否令俄國讓出數百里之語。又查東界被俄國侵占地方。其條約內有仍准中國人照常漁獵之語。明誼等如能遵奉寄

諭。將烏梁海等處亦令其一律讓出數百里。以便安置此項人眾。則該處雖被俄國侵占。尚可留有餘地。於該蒙古等生計似不無小補。應由明誼等與該國分界使臣反覆辯論。告以此係為該國計畫。恐各蒙古地面全行包去。伊等心懷不甘。勢必激生事變。於該國反為有損。即分界之人亦難